

痘疹世醫心法卷之六

羅田 密齋萬 全 集

平原 熙齋趙 燁 校

夏邑 嵩螺彭端吾 重梓

收靨證治歌括

凡一十九首

九

膿窠結就正鮮肥 瘡頂微焦欲靨時

漸次乾收無急慢 痂皮圓淨轉春暉

痘瘡成膿之後鮮明肥澤飽滿堅實以手拭之瘡頭
微焦硬者此欲靨也大小先後以漸收靨不失太急

正靨

收靨合格

不失太緩已靨者。痂殼周圍無有突凸陷凹者。乾淨無淫濕破濺者。此爲正靨。否極泰來之象也。

痘瘡收靨有真訣

面上身中要合格

面上吐漿頂聚珠

身中結疔堅如墨

凡痘瘡收靨之時。面上是一樣收。身上是一樣收。謂之不合格。乃倒靨也。面上痘瘡收格。痘頂吐膿結聚如珠子。樣滿面皆然。磊落可觀。惟兩耳與身上同。身上痘瘡收格。皮膿乾結如螺。靨樣緊淨堅厚。易自

脫落

收靨如將日數拘

幾曾筭得不差殊

但憑本痘分疎密

更向其人論實虛

論收靨不將日數拘看痘疎密人虛實

俗謂幾日發熱幾日出形幾日起發幾日作漿幾日收靨此大略之言耳痘有疎密毒有微甚人有虛實豈可一切拘以日數如瘡本疎者其毒微其中氣實又能食自然易出易靨固不待於旬日者如瘡本密者其毒甚其中氣實又能食榮衛調和內外無諸傷犯至十二三日可以刻期收靨也若其中氣

虛食少或內外曾有傷犯或遇氣候乖變因而難靨豈可必拘以日數哉

痘瘡收靨已無邪

不疾不徐乃更佳

太疾却防餘毒壅

太遲潰爛不成痂

治靨太急主

凡痘瘡收靨之時毒邪已解只要先後有次疾徐得中如收太急者毒邪未盡煎熬津液以致速枯必爲

目病爲癰毒爲諸怪疾甚至橫夭宜微利之以徹其

治靨太遲主

毒當歸九主之

二百

如收太遲者中氣已虛脾胃太

弱不能榮養肌肉使之完就以致潰爛內服十全大

補湯三十外用敗草散八十觀之

收醫太急
面無定瘡
不治

英山縣沈瀚乙丑春一女年十九出痘其婿鮑宗義之子也因痘收醫不齊予在孔家坊教書請予視之起發未透膿漿未成收醫太急非正醫也適占得渙之巽卦予曰痘證既逆卦象又凶病不可救矣果死一子十歲出痘將醫時亦與其姊前證同蓋厲氣傳染也及問卜又得渙之巽卦人皆憂懼亟請予治予曰勿憂此病可治其婿曰同一病證同一卦象在吾妻則不可治吾舅則可治者何

收靨急可治

也、予曰、以病言之、令正收靨太急、面無完瘡、故曰不治、令身面瘡半靨、膿腫尙存、故曰可治、以卦言之、先以夫占妻、用財爲主、卦中無財、兄弟發動、又尅妻財、所以凶也、後以父占子、用子爲主、子孫旺相、兄弟發動、能生其子、爲子之元辰、所以吉也、後果然無事、瀚曰、密齋不但善醫、而又善卜、聞者領之、

當收不收瘡潰爛

內外審候是何變

以法求之要着痂

痂不得成爲倒靨

大寒去蓋
不收主治

天熱過溫
不收主治

便秘不收
主治

瀉不收主
治

痘瘡過期不收。遍身潰爛者。此與斑爛不同。乃熟大

過也。其候不同。或因天寒失於蓋覆。使瘡受凍而不

收者。宜服五積散。外十用乳香燒烟於被內薰之。

或因天熱過求溫緩。使瘡被蒸而不收者。宜內服人

參白虎湯。外十或五苓散。外二十減去衣被。令少清

涼。以天水散。外十撲之。或大便秘結。內外極熱。毒氣

散漫。無陰氣。以斂之。而不收者。宜內服宣風散。外二十

或三黃丸。外八四順清涼飲。外二十用膽導法。外五十以

敗草散。外十觀之。或泄瀉氣虛。脾胃弱。津液少。肌肉虛

過飲不收
主治

食少不收
主治

脾虛食少
不收治驗

而不收者宜內服陳氏木香散_{二十}外用敗草散_十或因渴飲冷水過多以致水漬脾胃濕淫肌肉而不收者內服五苓散_{二十}如因食少氣虛而不收者人參白朮散_{三十}去葛根加桂主之已上諸證以法治之已潰者結薄痂未潰者結痂方為佳兆若痂皮俱不結者成倒靨矣

本邑庠生胡小山長女汪四竹之妻未嫁先出痘甚密膿成過期不靨請予調治此女平日脾虛食少性不肯服煎劑予乃以錢氏異攻散加木香青

皮煉蜜作丸米飲送服調理而安

便秘不收
治驗

又庠生胡仁山小山之子也幼時出痘甚密膿成
不靨漸至潰爛請予調治予問自起發以來未得
大便裏實熱蒸故不成痂議欲下之小山曰此子
素弱恐不可下時有一法士王克廉在符水甚靈
乃書一符焚而服之少頃腹中鳴而利所下清水
衆皆稱謝予亦喜之但思許久未便豈無燥屎今
所下清水乃一氣成符之驗待至次日痘益潰爛
予作膽導法取下燥屎三十餘枚如彈子大衆又

笑曰此法更妙痘卽收靨齊腰又不收大便自燥
屎初下一次又未行也予曰作符乎作膽導法乎
王師亦曰不如膽導法再取下燥屎十四五枚後
皆溏糞痘亦收盡而安王克廉氣字符法自此大
行

過飲不收
治驗

一小兒因渴飲水過多濕傷脾胃不能收靨以四
君子湯以人參補中白朮燥濕茯苓滲水甘草解
毒加防風以勝皮毛之濕白芷以逐肌肉之水桂
以利關節而去寒水之邪砂仁以溫胃止渴調理

而安

便秘不收
治驗

泄瀉不收
治驗

一小兒大便不通、熱蒸於內、而生其濕、以致浸淫、不能成痂、用當歸稍、生地黃、以涼血、麻子仁、以潤燥、酒大黃、以瀉熱、開結、生甘草、以和中、得利而安、一小兒泄瀉不止、食少、此裏虛、不能收、用陳氏木香散、合肉豆蔻丸、服之而安、

趙曰、臨朐一小兒四歲、正月二十九日出痘、長貫、各依日期貫漿、略不足、至十日當靨、不靨、發癢而、上略有烏色、身上白色、擦破有出血者、有無血者、

頭腫身不腫腹不脹好飲水寒戰說吃乳日吃不得至今十二日未靨一顆余令用十全大補湯加防風白芷癢止收靨而痊

趙曰臨朐痒生傳博學一小兒四歲出痘至十四日當靨不靨口渴腹脹作瀉發癢飲食少自出痘飲涼水多不食余曰此水之爲害渴瀉不妨用十全大補湯因瀉減地黃因癢加白芷因渴加五味麥冬前症悉除收靨而愈

遍身潰爛

少完膚

膿血淋漓勢已痛

潰爛至治

坐臥不能惟用觀
癰痕欲滅却宜敷

痘已成膿之後過期不靨以致潰爛膿汁淋漓不可

着席粘惹疼痛者用敗草散八十或蕎麥粉一百二

以絹袋盛於身體上撲之更多佈席上觀臥尤佳面

上欲不成癰點者用滅癰散七十八和百花膏九十

敷之

本邑民蔡承盛一子出痘甚密先請吾妾兄甘大

用醫吾所傳者至膿成後過期不靨面瘡潰腫起

止呻吟噎水吐食語音不清甘謂不治而去復請

過期不靨
噎水吐食
語音不清
可治者治

不可治

予治予視其病面瘡腫起正在貫腫遍身皆然非倒靨也噎水噎食者口唇腫硬吞嚥不便非咽喉潰爛也語音不清者鼻中壅塞氣不得通非失音也瘡毒盡出表病裏和可治也乃製一方用苦參酒浸牛旁子白蒺藜何首烏荆芥穗各等分爲細末酒糊爲丸淡竹葉煎湯下調理一月而安矣時鄰居一小兒病證相同亦請視之予曰不可治也或問何故予曰證不同也彼痘過期痘熟宜靨此痘猶生未得成膿不宜靨者一也彼痘腫脹猶

貫膿血此則面平目開皮脫肉乾二也彼痘喉舌
無瘡此則咽舌潰爛噎水失聲三也彼家私與蔡
氏求藥服之無效而死

胡三溪長女十三歲庚申夏出痘甚密請喻南麓
醫其母匡氏之意喻先學醫於我不知治痘之法
只以參耆犬補之劑服之二十日後過期不靨予
往視之念三溪之好也見其瘡已潰爛幸非倒靨
乃犯溫補藥多裏邪盡出表毒不解急宜解表勿
使皮肉腐爛喻猶強執爲是匡亦深信不悟又過

妄補不收
治驗

五日不收復請吾長男萬邦忠予教用防風荆芥
升麻以解表勝濕白芷以蝕膿逐水連翹牛旁子
甘草以解其鬱蒸之毒肺主皮毛因參耆之補肺
熱且甚時值夏火正旺用黃芩酒炒以瀉肺中之
火解時令之熱調理至一月而安

但到收時膿自乾

收藏歛束貴周圓

莫教潰爛痂皮嫩

至此還將倒靨看

痘子初出磊落成箇後來長大作膿始相連串外雖
相串皮下猶一箇是一箇至於結痂腫消膿乾現出

倒靨

初來本形所以收藏斂束要完全堅厚復成箇數爲貴或根脚相通皮肉相串者結痂之時亦要乾淨無有淫濕及濺破者次也若未成痂者潰爛已成痂者只是嫩皮此倒靨也

蘄水縣株林舖董希周一女十九歲辛丑十二月
中旬出痘請醫江萬吉治延至歲終不得收靨精
神已昏飲食俱廢江不能治而去時予在沙畝徐
淑道家治痘強留過歲壬寅元旦希周自來懇請
予往視之僵臥如死人任其開衾詳看而不知也